

Inatsisartut Naalakkersuisullu pillugit Inatsisartut inatsisissaattut siunnersuut
(Naalakkersuisut siulittaasuannit saqqummiunneqartoq

pillugu

Inatsisit Atortinneqarnerannut Ataatsimiititaliap

ISUMALIUTISSIISSUTAA

Siunnersuutip aappassaaneerineqarnerani saqqummiunneqartoq

Inatsisit Atortinneqarnerannut Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Isak Hammond, Inuit Ataqtigiit, siulittaasoq
Inatsisartunut ilaasortaq Andreas Uldum, Demokraatineersoq, siulittaasup tullia
Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Doris Jakobsen, Siumut
Inatsisartunut ilaasortaq Anders Olsen, Siumut

UKA2010-mi ulloq 13. oktober 2010-mi siullermeerinerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Namminersorneq pillugu inatsit 2009-mi atuutilerpoq. Taamaattorli Namminersorneq pillugu inatsimmi Namminersorlutik Oqartussani oqartussaaffeqarfit – tassa Inatsisartut Naalakkersuisullu – akornanni suleqatigiinneq - qanoq aaqquussaanersoq - immikkuualuttortalersorlugu nassuiaasersorneqanngillaq. Tamanna Inatsisartut Naalakkersuisullu pillugit inatsisissaattut siunnersuummi matumani siunertarinearpoq. Inatsisartut Naalakkersuisullu pillugit Inatsisartut inatsisaanni maannamut atuuttumi pingaarnerinnaat tunngavigineqarput. Inatsit pineqartoq 1988-imi akuersissutigineqarmalli arlaleriarluni allanngortinneqartarsimavoq, taamaattumillu inatsisissatut siunnersuut manna taamaalilluni inatsisip ataatsimut allanngortinneqarneratut ilaatigut isikkoqarpoq. Tassanissaaq aalajangersakkat erseqqarluttut erseqqissarnerisigut inatsit erseqqinnerulersinniarneqarpoq.

Inatsisissatut siunnersuut Inatsisartut suleriaasissaattut nutaatut siunnersuummut saqqummiunneqartumut aamma aningaasarsiaqartitsinermut inatsisip allanngortinneqarnissaa pillugu inatsisissatut siunnersuummut ataqtigiissillugu paasineqassaaq. Aalajangersakkat ilaat, tassa assersuutigalugu Naalakkersuisunut ilaasortat atuuffinnik allanngortinneqarnissaaq pillugu aalajangersakkat taamaalillutik inatsisit taaneqartut akornanni nuunneqassasut siunnersuutigineqarpoq.

Inatsisartut siunnersuummik siullermeerinninnerat

Siunnersuut siullermeerneqarnerani tapersersorneqarluarpoq. Inatsisartut Naalakkersuisullu pillugit inatsisaasimasup naleqqussarneqarnissaa partiit tamarmik tapersersorpaat. Pissaaneqarnerup pingasunut avinneqartarneranik tunngaveqarneq aamma Kalaallit Nunaanni atuunera inatsimmi erseqqissisinneqassasoq taamatuttaaq tapersersorneqarpoq.

Akerlianilli Inatsisartut ataatsimiinnerini ilaasortat qallunaatut oqalussinnaanngitsut oqalutseqarnikkut qallunaatut oqalussinnaasariaqarnerat partiit akornanni isumaqatigiinngissutaavoq. Inatsisartuni Naalakkersuisunilu ilaasortat kalaallisut oqalussinnaanngitsut kalaallisuummut oqalutseqarnikkut qallunaatut oqalussinnaasariaqartut Inuit Ataqtigii, Demokraatit, Kattuseqatigiit Patiat aamma Attassut isumaqarput. Tamanna Namminersorneq pillugu inatsimmut tamatumunngalu nassuiaatinut naapertuuttutut isigineqarpoq. Taamaattorli kalaallit oqaasii naalackersuineramik suliaqarnermi tunngavittut suni tamani atorneqassasut avaqqunneqarsinnaanngitsumik piumasqaataassasoq Siumut isumaqarpoq.

Allannguutissatut siunnersuut

Siunnersuutip siullermeerneqarnerata kingorna allannguutissatut siunnersuummik Naalakkersuisut saqqummiussipput. Allannguutissatut siunnersuummi § 9 erseqqissarneqarpoq, tassalu Naalakkersuisuni ilaasortat aamma kalaallisut oqalussinnaanngitsut kalaallisuummut oqalutseqarlutik qallunaatut oqalussinnaasariaqartut erseqqissumik oqaatigineqarpoq. Allannguutissatut siunnersuummi kalaallisut oqaasiliunngitsut qallunaatut oqalussinnaanissaannik ullumikkut periarfissaasoq Naalakkersuisunut ilaasortanut atatillugu erseqqissuusariaqarnermisut erseqqarissuseqanngitsoq Naalakkersuisut taamaallutik nalilerpaat.

Tusarniaanermi akissut

Tusarniaasagaanni Inatsisartut Naalakkersuisullu iluisa akornanni pissutsit kisimik pineqartussaasorineqarmata siunnersuutip tusarniaassutiginnissaa naleqqutinngitsutut inatsisissatut siunnersuummi nassuiaatit nalinginnaasut malillugit isigineqarsimammat atatsimiititaliap arajutsisimangilaa. Taamatut naliliineq ajornartorsiutitaqavinnngittussatut isigineqarsinnaanngilaq. Taamaallilluni aalajangersakkat nutaarluinnaat siunnersuummi atuutilersinniarneqarput, soorlu assersuutigalugu § 3, imm. 1 aamma § 5, taakkunani Inatsisartunut ilaasortat qinigaasinnaassusiat innarlerneqarsinnaanngissusiallu pillugit apeqqutinut tunngasuummata. Aammattaaq aalajangersakkat arlallit ingerlateqqinneqarsinnaasullu arlallit imaat annerusumik minnerusumilluunniit allannguuteqartinneqarput. Tamatuma saniatigut inatsit 2006-imi (UPA2006/98) kingullermik allanngortinneqarmat tusarniaaffigisartakkat arlallit tusarniaaffigineqarsimapput taamanikkullu aktiaatileqatigiiffinnut pisortanit pigineqartunut atatillugu Aningaasaqarnermut Ataatsimiititaliap aamma Kukkunersuineranut Ataatsimiititaliap pisinnaasaqarfii allannguuteqartinneqarsimallutik. Aammattaarmi taamanikkut inatsisissatut siunnersuutaasimasup saqqummiunneqarnerani tusarniaanermi akissuteqartitsinermi peqataasimasorpassuit qujassuteqarfigissallugit naleqquttuussasoq taamanikkut Naalakkersuisut siulittaasorisimasaat isumaqarsimavoq. Taamanikkut inatsisip allannguutissaatut akuersissutaasimasut siunnersuummi matumani allannguuteqartinngit ingerlateqqinneqarput. Taamanikkut inatsisip allannguutaa kikkunnut tamanut pingaaruteqarsimangaarmat allaat tusarniaanissaq pisariaqartinneqarsimavoq, inatsisissatut siunnersuummut matumunnga atatillugu sooq tamatuma massakkut taamaannginnera erseqqissorinangilaa. Taamatut naliliisimanerup tunuliaqutaa inatsisissatut siunnersuummi nassuiaatini nalinginnaasuni ajoraluartumik paasissutissiissutiginneqanngilaq.

Aamma nunami tamat oqartussaaqataanerat tunngavigalugu aqutsiffiusumi tamat oqartussaaffigisaannik ingerlataqarfiit - akunneranni – aaqqissuussaaneq namminerminni kisimi oqartussaaffigisatut innuttaasunullu pingaaruteqanngitsutut isigissallugu eqqarsarnartortaqqarpoq. Inatsisissatut siunnersuummut matumunnga atatillugu soqutigisaqaqatigiiffit tusarniaaffiginissaat naleqquppallaanngitsutut isigineqassagaluarpuunniit innuttaasut soqutiginninnerat paasinartuliortoqarnissaanillu pisariaqartitsinerat maannangaaq naammassineqareersimasariaqaluarpoq siunnersuutip tamanut ammasumik oqallisigitinneratigut.

Naalakkersuisut siulittasuannik apersuineq

Ataatsimiititaliap siunnersuummik suliarinninnerminut atatillugu Naalakkersuisut siulittaasuat apersorpaat. Naalakkersuisut siulittaasuannik apersuinerup nalaani paasissutissanik ataatsimiititaliap saniatigut oqaaseqaateqarfigisariaqagaannik saqqummersoqarsimanngitsoq ataatsimiititaliaq isumaqqarpoq.

Ataatsimiititaliap siunnersuummik suliarinninnera

Inatsisartut ukiuat ingerlaavartooq?

Inatsisissatut siunnersuummi § 10-kkut Inatsisartut inatsisaanni maannamut atuuttumi § 9, imm. 2 ingerlatinginngarpoq. Akerlianilli Inatsisartut inatsisaanni maannamut atuuttumi § 9, imm. 1 ingerlateqqinneqanngilaq. Inatsisartut ukiumut marloriarlutik ataatsimiittarnissaannik piimasaaq inatsisikkut aalajangersarneqartoq taamaalilluni atorunnaarsinneqarpoq. Tamanna pissusissamisoortutut ataatsimiititaliap isigaa.

Pingaartumik tassuuna allannguinnikkut – Inatsisartut kissaatigigunikkut – ukioq tamaat Inatsisartut ukiuattut ingerlaavartutut ataatsimiiffissatut aaqqissuunissaanut immikkut periarfissinneqarput, assersuutigalugu septemberimiit decemberimut aamma januarimiit junimut Inatsisartut katersuuttalerlutik. Tamanna soorunami Inatsisartut ingerlanneqarnerannut aningaasartuutaanerulertussaavoq ilaatigummi ilaasortat angalasarnerinut aningaasartuutit ullumikkornit amerlanerulersissuummata. Aningaasartuutit amerleriaataat Inatsisartumi ilaasortat ikilisinne-risigut annikillisinneqarsinnaapput allaallumi naligiimmik matussuserneqarsinnaallutik. Taamatut allannguinnissaq piviusunngortinneqarsinnaassaaq inatsisissatut siunnersuumi matumani § 2-p allangortinneratigut.

Inatsisartut ataatsimiittarnerisa allatut aaqqissuunerisigut ataatsimiittarnerit ataatsimiittarner-nut marlunnut sivikitsunut imartoqisunut eqikkartarunnaaraani inatsisit aaqqissuunneqartarne-rat pitsaarulissaaq, tassami inatsisit aalajangiiffigisassatullu siunnersuutit saqqummiunnissaat akuersissutiginissaallu sivikitsuararsuarmik piffissalernerqartarunnaassammata.

Taamatut allannguinnikkut inatsisissatut siunnersuut folketingip ukiuata naanerani akuersissu-tigineqarsimanngitsoq Inatsisartut ukiuata naanerani atorunnaarsinneqassanersoq isumaliuter-suutigissallugu pissusissamisuussaaq.

Naalakkersuisunut ilaasortamik tunuartsineq

Inatsisissatut siunnersuummi § 23, imm.2-mi Naalakkersuisunut ilaasortaq Inatsisartunut na-lunaaruteqaannarnikkut Naalakkersuisut siulittaasuata tunuartsinnaalissagaa nutaatut siun-

nersuutigineqarpoq. Taamaalilluni Naalakkersuisunut ilaasortap tunuartinneqarnissaata Inatsisartunit akuersissutigineqarnissaa utaqqeqaarneqartariaarutissalluni.

Aalajangersakkap allanngortinneqarnissaa pissusissamisuussasoq ataatsimiititaliaq isumaqarpoq, Siulittaasummi ilaasortamik tunuartsinera pillugu nalunaarut Inatsisartunit tigueneqarnanit tunuartsineq atuutilissamat. Akerlianilli tunuartsinissamik kissaateqarnerup piviusungortinnissaanut maleruagassat ullumikkut atuuttut malillugit pisoqartarsimaneratut qaammataini arlalinni utaqqisoqartarunnaassaaq.

Naalakkersuisut siulittaassuata ilaasortamik tunuartsinera Inatsisartut tapersersorumangituaarsinnaavaat. Taamaalilluni siulittaasup aalajangiinera atorunnaarsinneqassaaq ilaasortarlu iverteqqinneqassaaq – inatsiseqartitsinikkulli akornuserneqarsinnaanngitsumik. Ilaasortap tunuartinneqarnissaa Inatsisartut akueriumanngippassuk tamanna Naalakkersuisut siulittaasuanik tatiginninnikkunnaarnertut isigineqarsinnaanngitsoq ataatsimiititaliap maluginiarpaa.

Atuuffik aamma Inuussutissarsiut

Naalakkersuisunut ilaasortat atuuffinnik allanik suliaqarsinnaanerat pillugu aalajangersakkat aningaasarsiaqartitsinermut inatsimmi § 9-mit Inatsisartut Naalakkersuisullu pillugit inatsimmi § 25-mut siunnersuuteqarnikkut nuunneqarpoq. Tassunga atatillugu oqaatsip "atuuffiup" maannamut nassuiarneqarnera § 25 pillugu nassuiaatini allanngortinneqartoq ataatsimiititaliap maluginiarpaa. Taamaalilluni nassuiaatit malillugit oqaatsimi "atuuffimmi" oqaaseq "inuussutissarsiut" aamma ilanngunneqarpoq, imaappoq suliat suulluunniit aningaasarsiaqaataasut imaluunniit aningaasarsiaqataanngitsut. Maannamut periaasiusumut tunngatillugu nassuiaatit allanngortinneranut pissutaasoq aalajangersagakkamut nassuiaammi ajoraluartumik paasisstissiissutigineqanngilaq.

Inatsissatut siunnersuummi § 25-mi oqaatsip "atuuffiup" nutaamik nassuiarneqarnera pillugu Inatsisit Atortinneqarnerannut Ataatsimiititaliap isummerfigissagaa Qinigaanerup Misilinneqarnissaanut Ataatsimiititaliamit kissaatigineqartoq Inatsisit Atortinneqarnerannut Ataatsimiititaliaq ilisimatinneqarpoq. Taamaattumik Dansk Sprognævniut tusarniaanermut akissut pissarsiarineqarpoq, imatut oqaasertalik:

"Den Danske Ordbog (www.ordnet.dk/ddo) naapertorlugu "hverv" (atuuffik) tassaavoq 'tatigisaalluni ataqqinaatitulluunniit suliassiissut, atuuffik suliarluunniit'. Ordbogi taanna aamma malillugu "erhverv" (inuussutissarsiut) isumaqarpoq 'suliaq aningaasanik isaatitsiffiusoq allatulluunniit ajunngitsorsiassanik pissarsiffiusartoq'.

Politikens Nudansk Ordbog med etymologi (4. udg., 2010) taamaqataamik allappoq "hverv" (atuuffik) tassaasoq "immikkut atuuffik suliassaqaqarfilluunniit, "erhverv" (inuussutissarsiut) tassaatinneqarluni "suliaq aningaasanik isertitsiffiusartoq piginnaasanillu aalajangersimasunik piumasagaateqarfiusoq = SULIAQ, INUUNIUT, SULIFFISSARSIAQ, ATORFIK, INUUSSUTISSARSIUT'.

Taamaalillu pingaarnerusutut najoqqutassatut "inuussutissarsiut" "atuuffiup" ilagisinnaanngilaa.

Ilanngullugu oqaatigineqarsinnaasoq "atuuffik" tamatigut paasineqartarmat sunngiffimmi ingerlatatut apeqqutaatinnagu atuuffik akissarsiaqataaneersoq imaluunniit naamik."

Ataatsimiititaliaq naliliinermini Dansk Sprognævni isumaanut naapertuuttumik isumaqarpoq. Aamma nassuiaat inatsisissatut siunnersuummi saqqummiunneqartutut ilaatigut Qinigaaernerup Misilinneqarnissaanut Ataatsimiititaliamit maannanut pisarnermisut atorsimaneraa takuneqarsinnaanngilaq.

Tamatuma saniatigut ataatsimiititaliap naliliinermini oqaatsit oqimaalutarneqarnerat immikkut pingaartippaa. Taamaalilluni inatsisilerinikkut naliliinermini "oqaatsinut killigititaq" qaangerneqassanngilaq, oqaasermi atorneqartoq oqaasilerineq kisiat eqqarsaatigalugu inatsisit oqaasertaani qanoq annertutigisumik atorneqarsinnaanersoq oqaatigineqarmat. Tamatuma saniatigut Naalakkersuisunut ilaasortap Naalakkersuisunut ilaasortaanermini suliassami saniatigut inuussutissarsiutit allat naleqquttumik isumagisinnaanera Naalakkersuisut siulittaasuata kisiimiilluni aalajangertariaqaraa oqaatigineqarsinnaassagunarpoq.

Isumaliutissiissummi matumani oqaatsit "atuuffiup" aamma "inuussutissarsiutip" taaneqartut mannalugu tikillugu paasineqartarnerat siunissami inatsisip pineqartup nassuiarneqartarnerini atorneqartassatut ataatsimiititaliami amerlanerussuteqartut isumaqarput. Taamaalilluni oqaatsip "atuuffiup" inatsisissatut siunnersuummi nassuiarneqarnera ataatsimiititaliap tapersorsinnaanngilaa.

Nuna tamakkerlugu kommuninullu politikkimut tunngatillugu oqaaseq "atuuffik" assigiinngitsunik nassuiarneqartassappat tamanna ajuusaarnartorujussuussasoq ataatsimiititaliattaq erseqqissaatigissavaa. Taamaattoqalersinnaavoq "atuuffik" pillugu inatsisissatut siunnersuummi matumani nassuiaat taaneqartoq aamma "inuussutissarsiummut" annertusitillugu atorneqartalissappat. Taamaalilluni kommunit aqunneqarnerannut inatsimmi oqaaseq "atuuffik" atorneqartoq "inuussutissarsiummut" ilanngunneqanngitsutut isumaqartillugu atorneqarpoq.

Naalakkersuisuni tunuortoqarneratigut qinersineq

Siulittaasoq Inatsisartunit tatigineqarunnaartillugu Naalakkersuisut siulittaasuata qinersinissamik nalunaaruteqarsinnaanera eqqarsaatigalugu § 28-mi aalajangersakkat erseqqinnerulerput. Assersuutigalugu taama pisoqarsinnaavoq naalakkersuinermini pissaaneqarnermi pissutsit allanngornerisigut imaluunniit ilaasortat pisortatut suliainnik ingerlatsinerat naammagineqarunnaarsillugu imaluunniit allatut pissusilersornerisigut.

Taamaalilluni nutaamik qinersinissamik nalunaaruteqarneq "sumiiffimmi" pissasoq maanna erseqqissarneqarpoq. Imaappoq aalajangiineq Inatsisartuni pissaaq piffissarlu eqqarsaatigalugu Inatsisartut tatiginnikkunnaarnerminnik oqaaseqarpata tamanna pissaaq – amerlanertigullu tamanna pisarpoq ataatsimiinneq ataatsimiittarfimmi allarteqqinneratiigut.

Siunnertuutip aningaasaqarnikkut kingunissai

Inatsisissatut siunnersuut pisortanut aningasartuutaasussatut isigineqanngimmat ataatsimiititaliap arajutsisimannngilaa.

Ataatsimiititaliap inassuteqaatai

Naalackersuisut allannguutissatut siunnersuutaat akuersissutigineqassasoq ataatsimiititaliap isumaqatigiittup inassutigaa.


Tamatuma kingorna Naalackersuisut inatsisissatut siunnersuutaat iluserilikkamisut iluseqarluni akuersissutigineqassasoq ataatsimiititaliap isumaqatigiittup inassutigaa.

Taamaattorli oqaatsit "atuuffiup" aamma "inuussutissarsiutip" qanoq paasineqarnissaat pillugu Siumut ima oqaaseqarumavoq:


Siumut isumaqarpoq, Inatsisartut siulittaasuat, Naalackersut siulittaasuat Naalackersuisunullu ilaasortat qinikkatut atuuffimmi saniatigut inuussutissarsiuteqarsinnaanerak akissarsiaqaataaluni akissarsiaqaataaniluunniit, pissaanermik atornerluinnginnissamik aammalu soqutigisarsunnginnissaq qulakkeerniarlugu aaqqiissuteqartariaqartoq. Taamaammat Siumup inatsisikkut qulakkeerusuppaa, pissaanermik atornerluinnginnissaq soqutigisarsunnginnissarlugu anguniarlugu inatsisikkut sukaterisoqartariaqartoq nalilersuisoqartariaqartorlu.

Siumut isumaqarpoq, Inatsisartuni siulittaasuussagaanni, Naalackersuisuni siulittaasuussagaanni aammalu Naalackersuisuni ilaasortaassagaanni suliffik 100 % -imik atuuffiusariaqartoq saniatigooralugu atorfiunani Soorlutaaq Inatsisartut Siulittaasuat, Naalackersuisut Siulittaasuat Naalackersuisunilu Ilaasorta q arlaannaatigulluunniit attuumassuteqarani innuttaasut assigiimmik sullinnissaanut inatsisitigut tunngavilerneqarnera qulakkeerneqassasoq.

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappasaaniigassanngortippaa.



Isak Hammond,
Siulittaasoq



Andreas Uldum



Debora Kleist



Doris Jakobsen



Anders Olsen

20. oktober 2010

EM 2010/24

Allannguutissatut siunnersuut

uunga

Siunnersuut uunga: Inatsisartut Naalakkersuisullu pillugit Inatsisartut inatsisaat

Aappassaaneerinissamut Naalakkersuisunit saqqummiunneqartoq.

§ 9-mut

1. § 9, imm. 2, oqaasertalerneqassaaq imatut:

”Imm. 2. Inatsisartuni isumaqatiginniarnerit kalaallisut ingerlanneqassapput. Inatsisartunut Naalakkersuisunullu ilaasortat kalaallit oqaasiinik atuinngitsut danskisut oqalussinnaatitaapput, oqaasiilu kalaallisuumut nutserneqassallutik taamatuttaarlu isumaqatigiinniarnerit danskisut aamma malinnaaffigineqarsinnaassallutik.”

Siunnersuummut nassuiaatit

Nassuiaatit nalinginnaasut

Allannguutissatut siunnersuutikkut erseqqissarneqarpoq Naalakkersuisunut ilaasortat kalaallit oqaasiinik atuinngitsut Inatsisartunut ilaasortat allat naligalugit Inatsisartuni danskisut oqalussinnaasut kalaallisuunngorlugit nutserneqartunik. Erseqqissaanissaq pisariaqartinneqalersimavoq Naalakkersuisunut ilaasortat Inatsisartuni isumaqatigiinniarneri aamma oqalussinnaatitaasariaqarmata.

Aalajangersakkanut ataasiakkaanut nassuiaatit*Nr. 1-imut*

Imm. 2-kkut naqissuserneqarpoq kalaallit oqaasii Inatsisartuni sulineri oqaasiusut peqatigisaanillu qularnaarneqarluni Inatsisartunut aamma Naalakkersuisunut ilaasortat kalaallit oqaasiinik atuinngitsut Inatsisartuni danskisut oqalussinnaasut kalaallisuunngorlugit nutserneqartunik. Tamatumuuna qularnaarneqarpoq danskisut oqaasillit Inatsisartunut ilaasortassatut qinigaasimasut innuttaasut qinersinerisigut qinikkani inissaminnik isumaginninnissaminnut aamma periarfissaqarnissaat. Taamaalilluni Inatsisartunut ilaasortat inatsisartoqarnermi oqaaseqarnissamut kiffaanngissuseqarnerisa kiisalu kikkut tamat oqartussaaqataanerisa mianerineqarnissaasa piumasarissavaat isumaqatigiinniarnerit nalaanni pisariaqarneratut oqalutsit ikiuuttussat atugassanngortinneqarnissaat. Tamanna inatsisartut inatsisaanni maannamut atuuttumi § 13 naapertorlugi periusiusumut naapertuuppoq. Periarfissiinikkut ilanngullugu qularnaarneqarpoq innuttaasuni danskisut oqaasillit Naalakkersuisunut ilaasortatut suliaminnik isumaginnissinnaanissaat. Kiisalu innuttaasuni danskisut oqaaseqartut isumaqatigiinniarnerit ingerlaavartunik nutserneqartarnerisigut Inatsisartuni sulineri malinnaanissaminnut tunngaviumik periarfissinneqarnissaat. Tamatumuuna qularnaarneqarput innuttaasuni ilaasut taakku kikkut tamat oqartussaaqataaneranni peqataasinnaanerat sinniisussamittullu qinikkamik sulineranni paasissutissinneqarluarlutik nalilersuisinnaanerit.